

Zeitschrift: Heimatschutz = Patrimoine
Herausgeber: Schweizer Heimatschutz
Band: 52 (1957)
Heft: 4

Artikel: Es Mümpfli rächts Schwyzertütsch
Autor: Klee, Heinz
DOI: <https://doi.org/10.5169/seals-173633>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 19.07.2025

ETH-Bibliothek Zürich, E-Periodica, <https://www.e-periodica.ch>

Es Mümpfeli rächts Schwyzertüütsch

D Zaalwoort «zwäi» und «drüü»

Di mäischte vo öisne schwyzertüütsche Mundaarte händ für d Grundzaale «zwäi» und «drüü» verschideni Forme:

fürs «zwäi» für eniedes Gschlächt en äigni: *zwee* Mane, *zwoo* Fraue, *zwäi* Chind; fürs «drüü» äini fürs mänli und s wypli Gschlächt zäme, und en anderi fürs sächli Gschlächt: *drei* Mane, *drei* Fraue, *drüü* Chind.

Daas isch rächts Züritüütsch.

Und an anderen Oorte? I de «Schwyzer Schnabelwäid» vum Traugott Vogel läsed mer:

«U daß me wäge däm t'wäge *zwo* Stund wytt soll loufen ...»

«Das het nen uf öppe *drei*, vier Meter lah zueche cho ...»

Bëérnpiet, Ernst Balzli, «Äschlima Godis Ungfell».

«Zersch geischt i d Apotheegg u chauffsch für *drei* Batze Tüfelsdräck. Derno nimmsch bim Fleugebeck im Egge no-n-e *Zweupfünder*.»

«Für *zwe* Batze!»

Bëérnpiet, Simon Gfeller, «Vo Hanslin».

«*Drej* Batze, wenn's mr rächt isch.»

«Und für deini het er au numme *zwee* Batze gheusche ...»

Baselpiet, Traugott Meyer, «E Pfuusi».

«... ond wo sie ghört het, me verdieni ame stobelange Strech *zwe en halbe bis dri en halbe* Rappe ...»

Appizälerland, Walter Rotach, «Firobestonde».

«De Bueb hed di *zwäu* Gleser und die *zwee* Chueche schier nid chönne träge ...»

Luzéérnerpiet, Josef Roos, «Der Schuehmacherwändel».

Wäme vo Zaale redt, wäme d Stunde zelt oder s Alter aagid, bruucht me d Form fürs sächli Gschlächt:

i han es *Drüü* ghaa im Zügnis,
mer gönd ufs *Zwäi*-Tram,
er isch *drüüjëërig* gsy.

Die verschidene Forme, andersch weder im Hoochbüütsche wos nu äini häd:

zwei Männer,	zwei Frauen,	zwei Kinder
zürit. <i>zwee</i> Mane,	<i>zwoo</i> Fraue,	<i>zwäi</i> Chind,
drei Männer,	drei Frauen,	drei Kinder,
zürit. <i>drei</i> Mane,	<i>drei</i> Fraue,	<i>drüü</i> Chind,

sind nüd öppe e näis Möödeli, si sind en alts Eerbstuck vum Mittelhoochbüütschen und vum Althoochbüütsche héér, au de Martin Luther häd si na ghaa.

Und au bi «beide», wos uf rächt Züritüütsch ghäifst:

beed Mane, *beed* Fraue,
aber: *bäidi* Chind,

gönd die verschidene Forme ufs Althoochbüütsch zrugg.

Das isch hützetaags alls echly durenandgraate.

Nüd as me z. B. z Züri nu s «zwäi» ghöörti, d Lüüt bruuched aus s «zwee» und s «zwoo». Nu ebe gwöndli am lätzen Oort:

zwäi	Taag	astatt	<i>zwee</i>	Taag,
druü	Wuche	astatt	<i>drei</i>	Wuche,
drei	Jaar	astatt	<i>druü</i>	Jaar,
zwoo	Pier	astatt	<i>zwäi</i>	Pier,
zwoo	Franke	astatt	<i>zwee</i>	Franke,
zwäi	Fraue	astatt	<i>zwoo</i>	Fraue,

und e dërewääg gaads wyter.

S gid Lüüt wo säaged, uf daas chëëms iez würkli nüd druf aa, me verstöndi glich was gmäint seig, und s Schwyzertüütsch göng wäge dem nüd undere.

Zueggëe, di bäide Zaalwoort mit ire Forme sind nu e chlyses Stäinli in öisere Häimetspraach. Aber wän alpot äis usegheit, se isch am Änd nüüt me ume.

Gämer is drum Müe, die Forme, deete wo mes na känt oder set käne, z bruuche – am rächten Oort, verstaat si! –, si gänd öisem Schwyzertüütsch Läben und Abwächslig.

Won i z Züri gwont ha, bin i öppedie *uf* Basel abe.

Wän öpper imene hoochbüütsche Brief schrybt: «Als ich zu Zürich wohnte, fuhr ich öfters auf Basel hinunter», se wuuer mer en uuslache und em säage, er sel namaalen i d Schuel. Wän aber äine verzelt: «Won i in Züri gwont ha, bin i öppedie nach Basel gfaare», de säit ekän Mäntschi nüüt.

Deby isch «in Züri» und «nach Basel» ime schwyzertüütsche Satz tufpet glich lätz wie «zu Zürich» und «auf Basel» im schriftbüütsche.

S isch äigetli echli gschäigmig, as mer bim zwäite Byspil nüd au reklamiered. D Oore settid is wee tue, wämer das Gmues ghööred: in Züri, nach Basel.

Wie anderscht, wie uurchig und läbig chyds uf guet Züritüütsch:

z Züri, z Basel, z Ängland, z Amerikaa;
uf Büüli (use), *uf* Basel (abe), *uf* Amerikaa (übere).

Daa gspüürt me, daas paßt zuuen is, daas isch uf öisem Bode gwachse.

Im eltere Züritüütsch häd men au na öppe gsäait: ge Züri, ge Basel.

Losed mer uf d Mundaart-Dichter us andere Dialäkte (d Byspil sind wider us de «Schwyzer Schnabelwäid»):

«Äm Samstig bin ich i d's Tal abe und mit em Dorfvogt Peter *gu* Linthel g'fare.»
«Die meiste Sännte Chäs hät er schu z'Linthel unde g'cha . . .»

Glaarnerland, Caspar Streiff, «Der Heiri Jenni im Sunnebärg».

«Der Houpme Brambärger isch scho währed der Schlacht mit dem Lazarett *uf* Wilna abgschobe worde.»

«I der erschte Hälfti Chrischtmonet ghöre die beide Bärner einisch, wo sie z'Wilna i ihrem Quartier zum Fänschter us luege . . .».

Bëern, Rud. v. Tavel, «Cheiser der Napolion ischt nach Rueßland zoge».

« . . . het er d Frau Meria frindligscht iiglade, au ihm derfir emol in sym Schloß z'Bärluin d Ehr azdue. S Johr druff isch d Frau Meria richtig *uff* Bärlin gräist mit em Hintergidangge, im Keenig bi där Glägehait ihri Uffwartig zmache.»

Basel, Dominik Müller, «D Frau Meria und de Keenig vo Breiße».

Au s «z» und s «uf» (oder «ga, ge, gu») sind öppis wo zun öisere Häimetspraach ghöört. «In» und «nach» sind rächt im Schriftbüütsche, aber i öises Schwyzertüütsch ghööred nüüd, daa würkeds bläich und schwach.

«Z Züri», «*uf* Basel», wie chydt daas läbig und früscht. Drum wämers bruuche und öise Chinde voorlääbe!

Heinz Klee